

會集詞

序

鄉前輩秦敦夫先生與元暨江鄭堂先生年學相近
先生學問淵雅於書無所不窺尤工倚聲嘗校刻宋
元人詞集祕本爲詞學叢書所著享帚詞久已刊行
道光丙申年不戒於火凡宋元精刻及傳鈔祕籍爲
藏書家所未見者悉歸煨燼詞板亦焚燬無存令子
玉生孝廉求得初印佳本重刊行世而問序於余夫
以先生之才學品望幼承庭訓兩世稱名翰林爲同
時老輩所折服既已策名

清時宜膺大用迺屢次從容恬退乞假以歸博聞強識閉門著書凡若干種詞學雖其餘事然寢饋於斯數十年所倚聲皆綿麗溫柔清轉華妙卽古之梅溪白石不能過之也而卒以掩其鉅學他日玉生續刊全集蔚爲大觀則是集不過藝苑之初枕詞林之嚆矢耳元垂老矣尚欲拭目以覩其成故先樂得而敘之歲在丙午二月初吉前翰林院後一科侍生儀徵阮元撰

自序

士生天壤間不獲見知於世窮愁侘傺獨處無聊於是乎託身於隱以自晦或披裘而負薪或岩居而谷飲以及織簾賣藥鼓刀販繒緇黃之流皆隱也而茲之以詞隱名焉何居噫古人云名德不昌致有期頤之壽君子蓋隱痛之矣僕家有藏書二萬卷闢屋三楹坐臥其中暇則吟諷以資笑傲隨意所感寓之於詞或矢口而謳吟或曼聲而長嘯等諸擊壤之堯民有類悲秋之宋玉凡人世之憂愉欣戚榮辱得失胥

不入於寤寐嗟夫年已垂暮不能角逐少年之場尚
敢妄冀古人耶昔子雲草太元覆瓿見誚於劉歆區
區雕蟲小技又烏足道哉

道光歲在辛卯立秋後十日詞隱老人自序

享帚詞目錄

卷一

西子妝慢

望梅花令

薄倖

鬪百草

夜飛鵲慢

翠羽吟

念奴嬌

一斛珠

水龍吟

玉簫涼

青門引

水龍吟

真珠簾

選冠子

庭院深深

沁園春

昇平樂

百字令

四闋

木蘭花慢

琵琶仙

買陂塘

眉嫵

石湖仙

滿江紅

清平樂

醉春風

憶舊遊

貂裘換酒

風流子

南鄉子

二闋

眼兒媚

長相思

玉連環

露華慢

卷二

六州歌頭

解佩令

水龍吟

夢橫塘

天香

小庭花

洞庭春色

念奴嬌

唐多令

夜遊宮

五線結同心

月底修簫譜

意難忘

濕羅衣

一落索 二闋

擷芳詞

浪淘沙令

明月掉孤舟

虞美人

阮郎歸

應天長

七娘子

定風波

金蕉葉

攤破南鄉子

戀繡衾

蘇幙遮

淡黃柳

青玉案

一萼紅

八歸

秋霽

霜葉飛

西河

滿江紅 二闋

轉調二郎神 音

氏州第一

齊天樂

八聲甘州

卷三

慶清朝

鳳凰臺上憶吹簫

柳梢青

折桂令

疎影

南鄉子

埽地遊

滿江紅 四闋

一七令

江城梅花引

解連環

金縷曲

換巢鸞鳳

高陽臺

木蘭花慢

四闋

花犯

水調歌頭

瑣窗寒

催雪

玲瓏四犯

采桑子慢

醜奴兒近

法曲獻仙音

小石調獻仙音

霓裳中序第一

側犯

最高樓

安公子

最高樓

金人捧露盤

洞仙歌令

二闋

卷四

蕙蘭芳引

琵琶仙

龍山會

淒涼犯

隔浦蓮近拍

壽星明

蒼梧謠

春從天上來

石湖仙

鳳簫吟

虞美人影

一萼紅

驀山溪

豆葉黃

祝英臺近

清商怨

訴衷情

品令

引駕行

浪淘沙令

醉春風

芳草渡

一翦梅

梅花引

卜算子

南歌子

步蟾宮

小重山

二郎神

長亭怨慢

蝶戀花

玲瓏四犯

珍珠令

百字折桂令

燕歸梁

二闋

菩薩蠻

烏夜啼

摸魚兒

三犯渡江雲

絳都春

探芳信

越女鏡心

四園竹

驀山溪

賀新涼

江城梅花引

道光乙巳年冬十有一月享帚詞四卷重刊於家塾

男蠟謹識

孫男鼎道

泰運

孚達全校字

享帚詞目錄終

朱光遠董刊

享帚詞卷一

江都 秦恩復 伯敦父

西子妝慢

林嘯崖觀潮圖

雪壓珠跳風馳水立百尺飛花如捲星芒射處不知

寒正閒凭碧峰丹巘襟懷乍展看老子何曾興淺對

蒼茫甚百端交集伊誰能遣 輕軒冕少壯年華踏

徧紅塵輟歸來霜鬢漸成翁記前遊白髭閒撚凌波

顧眄發長嘯湍迴電轉笑吳淞一半并州快翦

望梅花令

吳餘山以胭脂畫梅索題

一枝香占衆芳先
寫冷豔花光吞吐
荳蔻春風三五年
消息恁清妍
描得玲瓏箇箇圓
香落鬢脣邊

薄倖

和江子屏過紅如別院作用賀方回調填

手拈紅豆憶往事
心頭暗逗漫想像
神仙標格穩着
六銖衣縐最可人
臨水窺花姿姿媚
媚天生就更玳瑁
筵邊水晶簾下還
有何人消受
鎮日價情難遣
空剩了綠肥紅瘦
悔當年春信迢迢
煙水夢魂依約
人如舊是何時候
甚鸞鳳泊層城
闌苑相思又朝
朝暮暮惆悵花前
鴈後

鬪百草

過京口友人問山中况味漫賦遣興

性本疎狂漫憐事事傷
遲暮佇月蟾寒訪春鶯
老多被世緣錯誤
冒芳心悵亂緒縈絲
閒情沾絮便檢點
流光朱顏鏡裏等閒
暗度遙指花關掩處
泉石煙霞拚占却
沙鷗葦鷺紅袖添香
白衣沽酒儘陶然
琴尊雅趣浮生事
休乞山僧夢煨芋
且深住任從他笑
人鄧禹

夜飛鵲慢

七夕吳閶道中

明河耿清淺風細波平
空碧數點流螢紋紗籠住玉

蟾冷孤吟徐引秋聲蓬牕淡容與賴重衾新戀好夢
初成人間天上祇今宵萬籟都清 烏鵲也知人意
偏底事年年長是經營何苦天公謔戲忍教一水相
望盈盈甚時歡聚縱浮槎難問雙星笑嬌癡兒女惟
知乞巧不管離情

翠羽吟

調見竹山詞其自序云此調以飛仙步

虛之意爲其辭故詠羅浮梅花以寄意
初秋舟泛吳閶月影隨人清曠欲絕棖觸昔
年蓬島清遊之夢因詭託仙境借詠秋月倚
聲扣舷而歌未知其能合拍否也

野水低暮靄迷鱗翼點參差素魄寫秋冷光先透碧

罌罌杳然金風玉露空翠吹下銖衣有上清步虛仙
子凌波弄影遲遲 霜淨如練洗清輝天風吹起桂
楫頻移化作珠宮貝闕金碧縹緲天開圖畫時四圍
浪擊空明倒浸萬頃玻璃聽廣寒鈞奏聲細細香繞
塵飛醉夢乘雲送歸醒來依舊水之湄參橫斗轉半
落青天隔岸曉雞

念奴嬌

秋怨

夢回酒醒悵茸窻清悄雲幔遙深十二闌干都倚徧
這時渾是秋心字隱蛸涎書餘蠹粉離思渺難禁斜

陽去也還怕月上樓陰 多少恨惹愁牽空階墜葉
淒雁和哀砧萬里將雛憐羽短天末何處迷林漠漠
平蕪迢迢烟水猶自憶苔岑更無人處捲簾晝影沉
沉

一斛珠

題織雲女史爲陳月墀畫墨蘭扇面

曉來殘醉佯羞頻問醒還未惱人情態騰騰地一種
芳心斜睨憑誰寄 紉素疊成光綴綴生來不慣濃
香膩箇中藏得些兒意欲說同心說也非容易

水龍吟

陳月墀江山席飲圖

有人吟髮蕭蕭振衣欲上凌千仞長空無際蒼烟劃
破兼天波迅笑揖山靈舉觴遐矚松風相引對碧雲
暮合銷沉短笛殘陽外孤舟趁 誰把名韁忍困悵
歡期同心難準金尊玉斚花天月地恐天也靳狂亦
能醒愁何曾醉曩時重忖憶山中應有歸飛倦鶴故
人遙認

玉簫涼

雨後見新月有感和江子屏作

花氣吹涼漸晚碧弄晴度影穿牕前宵疎雨過記鵲
駕雙雙柔情因甚未展便隔水也是縈腸傳密意縱

織文迴錦難寫微茫 心降苔鋪逕濕梧咽露乾羸
得此際清光眉彎初照水似雨洗新妝樓頭不語暗
訴蹙淺黛著意思量誰會得這畫欄人影昏黃

青門引

叱犢春犁慣樵唱忽聽還斷溪烟盡處是村居三三
兩兩曬網綠楊岸 高情遠寄巢由伴早把荷衣換
等閒付與清興又都在水亭山館

水龍吟

真州城東開並蒂蓮一枝尤丈水村寫
城東花瑞圖暮橋索賦用姜白石詞填

是誰翦水裁雲手綰就同心雙髻凌波竝立輕紅衫

子添成薄媚有約偕來記曾涼夜妬嬌伴醉正遠風
微透生香不斷鴛鴦近雕欄睡 尚記江臯贈珮闌
芳姿月明風細碧圓影裏盈盈十五還疑拾翠不是
幽人有誰能寫水邊烟際甚靚妝解道爭妍未許尹
邢相避

真珠簾

葉竟亭鋤經種菜圖

堂堂歲月奔駒去咄書空信是儒冠多誤蒼鬢怯青
銅悵美人遲暮活計癡蠅鑽故紙更寂寞鸞臺鼇署
無據且繫短鏡長尋安心處 爲圃不廢爲儒笑謀

生計拙六州錯鑄閑戶息機心縱拊髀誰語世上軟
塵飛不到只檢點芸銷蟬蠹休顧任門外閒雲一重
重護

選冠子

昆陵韻香女史名徽蓮於雙修庵自度
爲女道士號清微道人家鳳梁孝廉以
空山聽雨圖索題因賦此調

邃館巖扉小簾雕榭密密冷雲鋪滿清泉噴溜敗葉
鳴颺併做晚牕零亂偏是引起閒愁攢上眉峯卻難
排遣任茶烟禪榻砌成幽恨細思量遍憑仗他洗
盡鉛華拋殘塵夢一味淒涼誰慣鐘沉繡押香潤衣

簪多在夜長人倦生怕消磨這番辜負虛檐芳情易
嬾想遙岑染就餘得痕青幾點

庭院深深

詠拒霜花

庭院深深深幾許西風薦地驚寒梅胎未破菊英殘
一叢疎碧裏春色上雕欄雨潤烟輕無限意胭脂
勻染痕乾拒霜休漫等閒看憐渠甘寂寞相伴老江
干

沁園春

醉司命

將築糟邱盍往觀乎視夜何其便徙薪以待比鄰徧

召據觚而聽卮酒安辭履舄茫茫衣冠颯颯更酌金
觥請飲斯頽然醉謂能令公喜偶一中之何妨顯
眼迷離觀世上蠅營似奕碁任黃羊特薦倡予和汝
丹砂立致舍我其誰熱尚因人煬還兆夢鄉里依然
向小兒君休矣漫矜言跨竈且學焚詩

昇平樂 元夕探梅

稷雪欺寒旦風催雨番番做弄春陰春在天涯鶯拘
燕管倩誰點逗芳心梢頭嫩影殢冰魂蝶夢難禁須
信道忍相思隔歲留到而今還借上元簫鼓把花

奴喚起吹染長林宮錦纏枝華鐙轉樹紅粧縞袂疑
尋殷勤酌酒買良宵春色千金明朝去試泥香風軟
踏破苔岑

百字令 長歌和彭羨門延露詞韻

海鹽彭少宰羨門起家宏博位至侍郎所作
百字令四闋沉鬱悲憤謂長歌之哀過於慟
哭僕讀其詞而感焉僕年踰五十名位不彰
有虛生之憂無適時之用泥蟠霧隱與世無
緣視羨門所遭奚啻什一夫渺沙予懷蒼蒼
在鬢情動於中而形於言若有不能釋然者
遂倚聲而和之雖瓦缶繼響自忘其醜不過
藉抒胸臆以當長嘯而已

長歌當哭任髭髯掀起肺肝摧碎得算得鈎何所據

轉羨爛羊都尉海拆天吳洲翻鸚鵡汗漫心如醉買
絲誰繡幾人能效毛遂 妄冀一顧空羣終虛伯樂
竟等求唐肆世上舉肥糠且食勝釣海東鯨鱠鶴誚
羊公龍疑董父强半黎邱鬼不如高卧屏風頭觸鼾
睡

知音寥落忍焦桐爨盡唾壺敲碎朝籍慵參仍市隱
彷彿會稽梅尉短後何嫌接羅倒著共約山公醉從
容長揖笑初衣願終遂 自信宮蠋多磨歧羊無補
不問君平肆領取百城書卷樂味過五侯鯖鱠脉望

睡
通仙瑯嬛守犬靈乞長恩鬼北窻安穩借他黃嬾添

壯心難抑把白羊鞭叱黃鶴搥碎五嶽峻嶒方寸起
說甚數奇飛尉狗監憐才牛衣溷跡只合懵騰醉古
人知我誰云窮達兼遂 濁酒澆盡胸中難平磊砢
僵卧黃公肆縱或元規塵易浣恁負秋風蓴鱸咄咄
書空嗚嗚擊缶嘯應空林鬼華胥先到昏然容我饒
睡

丈夫立意看據鞍顧盼控弦飛碎棄却軍纈身許國

生係羌侯蠻尉銘勒崖巔歌騰馬上飲至歆神醉路
人遙識羨功成與名遂從事盡召鄒枚累茵列鼎
如入鴻都肆鏤管雕鐘羣玉宴窮及蓬池仙鱸位擁
三旌車乘四望焜燿驚隣鬼黃梁纔熟古槐根下貪
睡

木蘭花慢 木筆花

倩江郎夢筆把春色點枝頭念雁字無憑雲牋待展
誰倚妝樓凝眸最宜礪石付何人畫出輞川游添得
裴王短句賦成燕睇鶯喉臨流蘸影池欄思染翰

綵毫抽更借潤松烟輕融籜粉花密香稠遲留正舒
眺處又斜陽淡暈晚風柔無奈倡條冶葉簾陰壓住
銀鈎

琵琶仙

消夏第一會吳穀人前輩招集夢煙舫即事

花事匆匆又偏是雨雨風風狼藉爭奈輕薄楊花粘
春去無跡終日裏移紅換紫早添了一庭芳碧待向
煙叢閒尋舊夢多少憐惜漫誇道裙屐風流似江
左清談座中客還把酒瓢詩卷付光陰虛擲看世上
浮雲弄影一任他簡曠胸臆未許鶯燕交忙畫欄人

寂

買陂塘

吳山尊學士招集消夏第二會詠盆中
種蓮子成荷

點波心藕花纔吐田田生意如許恍疑池上紅雲小
翻恐懼歌人誤呼伴侶且莫待香圍成陣難尋路對
花欲語怎偶爾天成便生憐意盡日未歸去斜陽
外泥我凭欄幾度誰人能解心苦淩波未肯侵羅襪
太液記曾迴舞天付與還一任水香風定嬌無主鴛
鴦且住休去傍樓陰雙痕淺暈烟水正迷浦

眉嫵

柳如是小象

甚垂楊坊巷弱絮年時生就好眉嫵信有憐才意風
流樣依依渾似張緒帽衫濟楚想箇儂心已先許料
伊是怕向塵埃老此情亦良苦千古軒軒韶舉儘
笑拚多買嬌願深貯紙醉金迷地傷心事柔條難挽
春去白楊作柱更可憐紅粉黃土這都是愁絲長只
恁恨千縷

石湖仙

七月廿八日壽吳穀人前輩

涼秋澄爽是天際真人濠濮間想宜管領烟霞比王
恭何須鶴氅山中黃綺遍海內一時無兩侑儻自灑

然遠謝塵埃 相期素心俊侶恣歡游忘言悟賞不
學松喬不慕弓腰歌掌著虎皮靴策桃枝杖逸情雲
上人盡仰香山洛社堪倣

滿江紅

十一月初三日舟泊寶應夜半聞榜人
絮語慨然而作

往古來今誰參破元機了了都只是夢牽形役有何
愚巧骯髒胸懷行不得百年雖壽猶爲天忒分明一
局近彈棋旁觀好 塵障面堪絕倒車生耳何須道
甚白衣蒼狗幻由心造忉利天中無我相淨名經內
蠲煩惱君試看堊鶴負青冥超雲表

清平樂

萊陽姜學在先生姬人陳素素畫墨桃
一株嫣然飛動萊陽題清平樂詞雪窗
展卷命小姬慈髮臨摹一幅并錄萊陽原唱
鄙作附和於後

雨絲風片一帶閒庭院春意忺人春不見贏得驚溪
生絹 崔護卻認前身墨痕粉暈猶新移向武陵溪
口漁人莫話迷津

醉春風

題陳生所畫幻娘卷子

月影兒遮護燈光兒暗覩清清冷冷沒多時住住住
幾許溫柔怎般滋味頓成輕負 別也如何遽來也
如何暮好天良夜可人兒去去去偏不分明恨難留

戀恨無憑據

憶舊遊

王柳村曲江亭圖

記留山作障因樹爲亭卜築臨江幾曲灣環水被長
楊圍住帆影如幢爲招舊日鷗鷺攜手上漁梁甚汗
漫襟期煙波飛動身世蒼茫相將喚兒女共量酒
評花山檻溪窗小試垂綸手把乾坤勝槩都付吟艣
更兼水木明瑟清夢入詩囊看筆陣雄師吾曹願乞
因壘降

貂裘換酒

唐陶山觀察還山養病圖

達宦車生耳羨乘時風雲咳唾紆青拖紫官好常思
羊元保那問英雄兵子也不管蓴鱸風起骨相定因
非食肉戀馬肝此味誠然美看世事君知矣江南
領畧佳山水寄遙情衡陽岱麓顧瞻尺咫天付精神
閒仍健消受諸天歡喜淨眼覩登伽稚齒貞疾維摩
雖一室建道場還悟天花旨施狡獪誰爲爾

圖中有琴書泉

石脩竹名鬢陶山自題云皆他日還山養病具也故末章及之

風流子

陶山觀察十眉圖

人生行樂耳年華換隨分漫郎當憶僕射可辭不如

娛酒三旌終謝還返屠羊我爲我任呼都散漢且醉
踏謠娘衫扇翦裁政爲公乞竹絲陶寫誰得卿狂
尊彝琴書外紛羅列都是雜佩明璫生就花天月地
次第平章較夏氏簾衣陋他儉率子京半臂禁甚輕
涼端底畫眉韻事合讓閨房

南鄉子

題慈髮秋花圖即呈施琴泉太史

細雨濕苔岑烟蕊風梢嫩不禁庭院晝長簾半捲
惜多恐花叢蝶夢侵紅萼未宜簪滿眼秋容無限
心判取一樽花下醉開襟趁好新涼耐淺斟

又

小圃豁涼襟金鳳花繁菊綻金殘醉海棠扶未起難
任誰與平章色淺深一蝶抱秋心不似羅浮夢裏
尋占得此生花底活駸駸粉豔銷凝半綠陰

眼兒媚

本意

秋水雙瞳翦冰綃眉語怎相饒十分酒殘幾行筆桂
畫出憨嬌惜他飛燕精神露暮暮與朝朝纖柔指
上玲瓏心底真個愁銷

長相思

晏小山有長相思詞戲效其體

享帚詩卷一
長相思長相思除卻相思總不知拋人到幾時
長相思長相思權把相思寄與伊那人人怎醫

玉連環

殷隱園秋林詩隱圖

煙林依約虛暝策杖探幽勝小橋流水自成村好整
頓青鞵興不辨幾人樵徑愛松風聲勁白雲有意
儻相招肯許我鷗盟定

露華慢

程一菴司馬蘅臯引秋圖

露蟬噪晚愛碧雲掩冉千樹涼陰亭臯送目移來瑤
席眠琴悵望美人香草是幾番憑眺閒吟塵境遠煙

蘿舊癖結契苔岑
相期故園重到看石磴疎花沙
際鳴禽應憐宋玉賦成一片秋心怎似幅巾藤杖任
眼前魚鳥飛沈延竚久歸來淡月遠林

享帚詞卷一

享帚詞卷一

五

江都 秦恩復 伯敦父

武林吳素江名景潮得古琴於土中修三尺四寸五分額廣五寸腰狹三

寸四分刮磨三日銘刻迺露其文曰東山之
桐西山之梓合而爲一垂千萬古上曰號鐘

下曰疊山共二十字隸法古勁知爲宋謝文節公故物也素江繪圖爲記與諸文士共賦之爰成雙調一百四十三字以誌懷古之悲良不與豔詞同科也

下簾閉肆長此隱塵蹤謀不用心倥傯失奇功恨安窮嘆息天亡宋麻衣擁包胥慟捐頂踵勞魂夢問蒼穹聲與淚俱何處巫咸訟鬱鬱孤忠漫陽狂市上侘

際一何雄此意誰通七絃桐 似青溪弄懷沙痛相
伯仲古今同膠漆凍苔蘚壅土花紅日號鐘廿字嘉
名重徽錯綜響玲瓏清徵動丹心貢聽飄蓬苦節安
貞未肯甘羈鞚毳帳狼烽寫蒼涼悲壯萬感溢心胸
髣髴思公

解佩令

輞川風景樊川詩句愛斯人襟抱如許夜月蒼涼指
點是青青煙樹憶吹簫玉人何處 清光依舊餘音
漸渺撫橋欄脩成千古曠代相思應不讓疎狂小杜

怎年華放教輕去

水龍吟

仿楚詞體創自稼軒蔣竹山效之以招落梅之魂黃子竹雲以舟隱圖索題慨然有感於楚客之言其長沙耶其靈均耶未可知也爲賦此調以當楚些

汎兮心似虛舟此棄兮在中流此公毋渡此驚濤駭
浪生新愁些過眼擲沙掉頭破甑人何尤些俯江流
如箭澧蘭湘芷徒增我離憂些 素遯兮無儔些年
已七十焉求些鴟夷一舸清風作餌月爲鈎些空洞
容卿周旋與我感蜉蝣些浩歌兮獨往烟波之樂樂
閒鷗些

夢橫塘

戴竹友銀藤花館填詞圖

舞紅庭院虛白簾櫳釀花天氣清寂一徑藤陰又早
是漫空圍碧誰放春歸畫屏依約有人橫笛抱芳情
脉脉畫影沉沉銷愁處須尋覓 吟牋付與娉婷將
檀槽坐擁暗裏偷拍占盡溫柔還打疊醉鄉消息鎮
長守朝朝暮暮玉管金尊恣憐惜好夢如仙簾紋如
水信光陰難得

天香

寓館聞蟬

蟾影窺帷蛩聲織砌諳盡殘更多少庾信清愁長卿

倦旅放浪天涯懷抱夢魂相繞疎柳外驀然驚覺側
耳微聞斷續星星暗添華皓 淒清恨伊太早怎無
端未秋先到憑爾哀音似訴倩誰知道不許愁人不
老更撩撥聲聲故相惱喚醒懵騰流光誤了

小庭花

題余秋室前輩畫紈扇美人

玉珮銖衣罷曉妝日高風軟立長廊逗他蜂蝶襲餘
香 紈扇乍攜裁暈碧錦裯初試漾流黃料應不似
冶遊郎

洞庭春色

題馮晉巖舍人啟蓁夢游弇山圖

若有人兮弁山之麓把臂證盟念瑯嬛塵鎖精靈七
子華胥仙引圓覺三生賞月吟風歸浩劫便一瓣長
留香火情依約記有啼鵲欲語流水無聲嗟余此
生休問忍林慚澗愧方寸屏營笑穴中憧擾徒銜寢
數眼前空洞不識杯鐺成佛生天爭一瞬算誰換他
年身後名歸計早縱海山兜率任我游行

念奴嬌

題吳思亭所藏竹垞圖即用竹垞原韻

星移物換仗精靈擁護不隨飄泊槐汧荷池同逝水
祇有丹青長託卻笑爭墩可憐留宅徒事生哀樂雪

泥鴻爪灑然胸次磊落

試看畫燈高懸擢歌人對

晨夕供斟酌同是天涯垂釣客輸與清風吹幙老我

青山賺人白眼萬事歸虛壑閒身猶健趁他殘照牛

角

唐多令

和顧澗翁吳門寄贈絳仙

帆影去悠悠無情江水流惜香心爭忍歸休一葉風
輕煙浪闊能載得許多愁離恨渺難收路遙情尚
留爲伊行煞是腸柔酒困花慵人瘦損廝合造在心

頭

夜遊宮

贈絳仙兼簡顧丈澗賞

曾記年時乍見籠輕霧一團嬌軟荳蔻香含初欲展
恁禁持這情苗何日刻恐是層城伴爲何事塵緣
迷戀故意教人醉心眼怕今生又勾留難自遣

五綵結同心

十一月廿五日賀程定甫廉訪納姬

千枝鐙耀六曲屏開良辰美景清佳還喜晴添線一
至日冬陽初透銀管又報飛葭依稀絲竹東山裏林泉
樂非競豪華須知道仙源路覓種桃別有人家網
來芋蘿西子看風鬟簇蝶霧鬢堆鴉酬笑明珠換真

無價量得萬斛非賒莫教辜負香衾暖更何羨飛蓋
烏紗且趁取酡顏難老與君醉酒簪花

月底修簫譜

辭家五載庭前老梅凋殘殆盡補種數株詞以慰之

被寒侵遭雪妬芳意頓如許瘦影橫空寂寞向誰語
可堪數盡花風都無人管盼消息天涯何處鎮無
緒料是生性孤清甘心受風雨投老山中好作歲寒
侶縱然花爲春忙春因花駐卻不道暗將春去

意難忘

詠素馨花

天與清香愛冰肌瑩白粉額塗黃玲瓏翻素珮嬌艷

曜明璫驚乍見暗窺相儼仙子凝妝又恁知天台錯
認誤了劉郎 生來麗質無雙悵同心易結清福難
償無香能比竝有夢耐思量拚薄醉惹迴腸怎輕負
風光說與伊流蘇帳底好護鴛鴦

濕羅衣

膩雲髻子俏容光春風娘娜含芳珮環凝響袞袂飄
香都成情緒迷茫憶吳娘玉顏不見尋消問息水遠
山長 當時真不減清狂記曾舞板歌梁忍教銀漢
便隔紅牆令人無計禁當那能忘幾生修到藍橋迢

遞愁損裴航

一落索 效毛東堂體

花也知人繾綣好將春絆暗香不住撲人來又卻是
微風斷 立向小亭閒看放開一半休將玉笛便橫
吹可知道春催攢

又 用六一詞體

懨懨獨自無情緒又流鶯聲住日高深院悄無人也
不管春來去 筆床茶竈憑分付愛尋拈毫素兒曹
笑問我胸懷早有箇安排處

東坡詩卷二
六
擷芳詞 過小秦淮水榭

屏山斂妝樓掩大隄東畔春風減欲遲留悵無由舊
恨前歡心上眉頭休休花濃染情銷黯茜窗深鎖
芙蓉靨柳絲柔水空流多少離人不綰新愁悠悠

浪淘沙令 漫興

甌破倩誰完往事沙搏思量舊夢少成歡不道黑頭
王掾在雙鬢如潘世味別鹹酸歌哭無端東陽衣
帶漸圍寬經卷藥鑪消受處添箇蒲團

明月掉孤舟

玉蘭效周草窗體
一名夜行船

姑射仙人粧淡靚亭亭立暮天雲淨舞試霓裳韻含
玉珮長向畫闌斜凭春釀就嬌柔心性惟留得素
娥低映弱不隨風豔難經雨生怕粉殘香賸

虞美人

風雨連朝殘紅頓盡倚聲以招梅魂靈
均宋玉同一寄慨

飛紅萬點春無主恨把花風數小樓永夜不成眠誰
識一場香雨可人憐明知別意難拚捨無那飄零
也算來還是酒能澆窖住春愁不放是今宵

阮郎歸

柳

春風吹恨上眉彎和烟籠翠鬟依依情緒忍輕攀流

紅水一灣 臨斷岸馬蹄殘春遊不放閒柳絲撩亂
鬢絲斑公然青眼看

應天長

海棠

煙絲織雨晴蕊颺風芳陰漸次成幄又見一株紅豔
亭亭立牆角鶯猶嬾燕初掠似伴我醉魂吟魄影憐
瘦占斷黃昏暗掩簾箔 真色信超羣縱是無香丰
韻自然各轉訝少陵詩興無心未牽著如嬌面添綽
約記髣髴壽陽妝閣儘沉醉莫強扶頭深夜驚覺

七娘子

送春

綠陽城郭高低樹悵渺茫誰辨春歸路落日銜山晚
煙迷渡匆匆總是銷魂處 今春忍使鶯花誤黯心
情不斷風和雨飛盡殘紅啼鵲不住赤欄橋外漫天
絮

定風波

短鬢蕭疎雪滿顛青衫翠袖兩潸然一曲琵琶能解
語酸楚不堪重唱想夫憐 玉柱未調聲乍促振觸
惱人方寸是冰絃回首昔年歌舞事曾記膩他情緒
總纏綿

金蕉葉

啼鴉只喚春歸去春銷歇向誰淒訴萬縷千條滿天
空舞風中絮到底挽愁不住思量沒箇安愁處聽
天公直恁分付有花也好無花也有陰陰樹瞥眼總
成虛度

攤破南鄉子 詠琵琶

休去撥琵琶絃聲咽不減胡笳古今一樣傷心恨是
誰寫出潯陽皓月漢塞平沙白髮尚情賒消遣著
冷落年華莫嗤名士操斯器岐王宅裏鬱輪新調猶

換烏紗

戀繡衾 訪水繪園故址

風流文采擅一時待羊求庭認履綦轉眼是煙雲散
看蠨蛸窗網挂絲我來對此添惆悵傍城闌山徑
水涯趁一帶斜陽裏只空餘芳草弄姿

蘇幙遮 宿雨香庵明月樓

月澄鮮波暖翠樓外空濛烟樹濃如齊閒向平欄還
獨倚風送疎鐘夜半添歸思醉時休醒時記舊夢
成塵萬感隨流水垂老光陰駒隙裏月色波光祇是

供憔悴

淡黃柳

重過水繪園效姜白石體

烏衣巷陌苔草侵堦碧候館荒涼春寂寂
斷壁都是相如舊詞筆
緬遺迹淒然弔魂魄畫圖
畔鼎彝側恁豪情盡化寒烟色望極平蕪漸隨流水
空憶臨江庾宅

青玉案

過汪氏南園有感

傷心不過羊曇路悵在苒年華去粉壁無人題秀句
月臺風榭好花深樹誰與春爲主
恨無大藥朱顏

駐玉走金飛任烏兔水上浮漚花上露遠碁侵夢候
蟲吟戶都是悲秋處

一萼紅

閏七夕

碧迢迢看明河澹泞烏鵲又填橋天也生憐情原不
老良夜重整星軺更何計愁深歡淺料此後休似泣
珠鮫莫負靈辰細思前度雲錦周遭
千古詞人多
事藉璇宮貝闕點綴吟毫十萬誰償七襄不報何事
長抱癡嬌再拋卻龍梭一月想人世兒女恨應消但
願年年歲歲只閨今宵

八歸 秋蟲效白石詞體

香銷複帳鐙昏重幕梧井暗翦碎葉迷離短夢驚迴
夜偏愛草痕深穩籬根生活隔院牆陰聞絮語最不
耐西風嗚咽漫付與醉後吟魂一味感騷屑 塵世
難逢笑口歡場無幾久化莊生園蝶樹間霜重水邊
煙淡觸緒愁心千疊耿宵長倦聽展轉懷人悵天末
殘更盡此時淒斷藉遣無聊移來窗影月

秋霽 秋葉效梅溪詞體

閒倚層樓對古木斜陽倍感蕭瑟廢井螢啼敗籬蛛

罥黯然亂愁如織破空舞碧徑荒沒盡莓苔跡漸暮
色還又荻花江上送羈客 情緒縹緲忍伴西風幾
回驚心吹動羌笛歎飄零身輕似蛻霜顏難仗酒腸
窄斜凭曲欄乘醉拍待酒醒後偏是寂寞魂銷晚鴉
低逐水村荒驛

霜葉飛 秋砧效片玉詞體

雁程來早關河迥深閨魂夢繚繞素娥青女引離愁
正嫩涼初到看墜葉辭柯似掃清宵迢遞相思悄託
遠意相將且慰我多情片石獨伴昏曉 憐彼素手

纖纖柔腸如結可惜哀怨誰告月明千里信音沉更
暗縈懷抱篆一縷秋心易老泠泠淒淒入么絃調怕玉
顏添消瘦珍重征衫淚痕多少

西河 秋水效西麓詞體

憑素鯉重重隔斷烟水殷勤有意託雙鱗江樓暫倚
落霞孤鶩寫長空澄波澹淡無際眼前心事罕寄
臨流暗感身世蒼茫一半接青冥半沉亂葦有情宋
玉賦悲秋傷心千古如此翠尊泛蟻買薄醉付虛
舟方寸難繫飽盡世間風味問何如舴艋爲家整頓

釣艇漁竿斜陽裏

滿江紅二首

黃楚橋車笠圖車中載書及酒傷友朋道缺古意云亡不如飲酒爲足樂也爰賦二章以寄慨

笑問先生巾車內何多長物須信道眼明如炬筆強
如鐵甯戚商歌成底用劉伶荷鍤終虛說且停驂重
讀道傍碑苔痕拂聲相應聯佩紱情暫阻分秦越
悵交淪中道古今同轍丁到聲華誇競爽孝標抵几
留風骨倒載歸硯礪怎能消胸懷熱
不飲何爲甘如醴麴生可託端倚賴破除煩惱盪曾

開膜萬卷詩書聊復爾子雲識字終投閣勸今日收
拾舊細囊徒糟粕功名事渾鑄錯謫世味屠門嚼
慕當年禽向徧遊名嶽蹤跡萍蓬心不繫醉鄉廣大
要盟約呼老兵即此是良朋非狂藥

轉調二郎神

雪意

凍雲四合早做就一天寒影陡覺曉風尖重帷深下
尚抱餘醒未醒自怪生來慊慊地錯認是文園愁病
正鐵馬響沉金猊香燼篆畦猶凝清冷澹烟乍斂
雕欄難凭望陣影飛鴻欲憑雙翼還又斜斜整整貫

酒換貂據牀邀笛重憶昔年豪興空賸得短髮離離
似雪不堪臨鏡

氐州第一

寒月和周清真韻

潮帶平沙炊霧弄晚孤村犬吠聲小凍影篩雲流光
擁鏡天際寒輝縹緲樓角盤鴉甚瑟縮猶驚餘照點
鬢憐潘圍腰恨沈歲華空老歎息知心人漸少料
惟有素娥低繞對影成三孤歡不偶最易添愁抱欲
乘風凌玉宇徘徊久闌干拍笑一片冰魂忒關情無
眠待曉

齊天樂

寒窗

季鷹心戀尊鱸美江南正饒烟水月落荒汀舟維斷
港漁火星星篷底鳴榔四起看冰影參差浪花搖曳
隔岸人歸夜深獨自擁蘆被斜橋細排雁齒趁溪
流宛轉殘縷重理錦字須憑銀鱗待剖別有相思盈
紙離情漫委歎魂夢驚寒故人知未付與波心望關
河尺咫

八聲甘州

客中度歲

記長安踏雪敝貂裘歸思渺難收望高寒尺五烟雲

縹緲玉宇瓊樓在萼江湖終老舊夢落滄洲不信機
忘處獨有眠鷗屈指一春消息盼庭梅放未約畧
香浮料餘寒有幾殘雪影猶留似風萍漸隨飄泊漫
無端歲月駛如流斜陽外亂帆西下數盡歸舟

享帚詞卷二

享帚詞卷二

古

享帚詞卷三

慶清朝

初春書懷

江都 秦恩復 伯敦父

霽色籠晴香痕逗暖東風偷換殘寒頻移帶孔沈腰
依舊圍寬遠憶謝孌嬌嫵翠微吹不斷眉山春情減
說愁說恨和夢都刪誰道白雲小駐笑一襟幽抱
浪擲雙丸逢春易感何地能賦清閒拚卻故山偃蹇
未妨老子儘癡頑休遲計快傾白墮聊潤蒼顏

鳳凰臺上憶吹簫

春雨

香屐衝泥暖風吹陌春心未肯牢關悄一夜寒生翠
幙不放春還欲共花枝索笑偏殢我梅信多慳巡簷
徧綠暈幾重苔繡斑斑空階倦聽細滴生怕是鴛
衾短夢驚殘好消受沉沉酒淺曲曲屏山銀字調箏
按譜誰解道忙裏偷閒春聲碎羈思盡付闌干

柳梢青

澗翁索題汪冬巢畫扇

額粉塗黃臉霞暈白筆底生香爛熳花風一齊吹徹
人與春長年來潦倒歡場看髣髴星星點點霜鬢取
清閒花封酒誥風月平章

折桂令

愛茅堂鎮日清閒松菊猶存倦鳥知還過眼都忘抽
身未早容膝能安補籬落淵明藥欄種梅花和靖
孤山喚醒癡頑貪了紅塵換了朱顏

疎影

題慈髮畫梅遺筆

生綃一幅有翠禽拂羽梅影分綠玉幃猶懸儂慙秋
容慙慙舊夢難續誰知萬事隨流水暗換卻山邱華
屋怕怨紅化作相思不管畫樓人獨曾記調朱暈
粉間花花葉葉香散幽谷蕙質蘭心燭翦窗西供養

亭記卷三
廿年清福如何一霎金風冷便滿眼夕烟寒木忍令人無限低回只賸淚珠盈掬

南鄉子

繡箔夜冥冥顛倒鴛衾睡不成身世兩塵都是夢分明情到深時轉薄情容易醉還醒怕引愁腸又合并可惜一天無用月空庭銀燭秋光冷畫屏

掃地遊

檢舊篋得慈髮遺墨愴然感懷

冷雲浸曉正楚客悲秋又添愁緒玉徽漫撫倩哀絃按撥怨情細數只恐冰絲未抵迴腸萬縷向誰語看

滿地落英花也淒楚環珮歸紫府記昔日盟言舊時眉嫵頓成間阻把零殘賸墨半摧風雨屈指悲歡不道飄萍散聚渺何許猛驚心隔簾鸚鵡

滿江紅

向來填詞家祇分平仄兩體惟滿江紅一譜而兼四聲且字句亦參差互異眼日按舊譜戲以四聲寫之各效其體拈弄筆墨隨意所適以破岑寂不值當家一哂也

休戀浮名把一切煩惱盡刪經卷與藥鑪相伴深掩禪關妄冀旂常鐘鼎福誰知玉宇竟高寒到不如山水有清音緣未慳琴調弄邀我彈酒斟酌強君歡漫瘦腰憐沈短髻驚潘此子身宜巖壑裏利牽名役

幾人閒也算他無事小神仙魂夢間平聲韻效姜白石體

無思無慮無拘無礙無非無是斷聲聞破除萬事獨

行獨止陡頓烟雲隨影幻儘他花月逢場美便假饒

一瞬遇波旬心如水平傷世態多奇詭羊公鶴遼東

不笑銅陵金穴眼前而已幾見西華邀盼睠孝標莊

論偏抵几更生憎霜髮換朱顏驚彈指上聲韻效杜祁公體

悔誤儒冠翻然向蒲團枯坐冥子裏自家思忖自家

叅破嘆往事隙駒容易過到如今影與形相和算只

是贏得我周旋誰能那安心處禪關卧開眼處乾

坤大人生百年中似蟻行磨漫不省茫茫塵海浣忍
一點未許靈臺挫喚醒人多少現身法分明箇去聲韻效柳耆卿體

天與逍遙休忘了春秋佳日也算箇天隨詩老四明

狂客籬外黃花鋪滿地榜門不讓羅含宅看眼前憂

樂遞相尋鷓鴣嚇開兩徑成三益杯在手琴橫膝

銷磨不盡意付諸詞筆君不見當年王景略凌空儻

氣猶捫蝨究何如無象遁元虛彌天釋入聲韻效蘇長公體

秋秀爽清幽雲影澹月華流螢冷蕪苑烟鎖迷樓雁
飛吳地盡濤接大江頭懷古不禁俯仰幾人能繼蘇
歐玉簫橋畔月三五捲上珠簾恰半鉤

江城梅花引

七夕謠

斜河一道界相思正歡期又將離歲歲年年誰與熨
雙眉人世難猜天上事情爲累便神仙也是癡 怨
時恨時心自知對七襄淚暗滋莫知我勸日蕉萃雖
悔何追我願綠章通帝進芻辭十萬代償除夙負恩
怨泯兩團圓倒好嬉

解連環

和周美成韻

去鴻誰託向江南悵望水雲繚邈忍令我空際傳書
縱千語萬言也傷疎薄記得來時幾曾料這般離索
想而今悶損盡是種愁怎覓靈藥 忘憂仗憑下若
嘆如癡似醉星犯張角到此日空鑄相思把密愛深
憐暗裏拋却水遠山遙尚仿佛唇朱眉萼擁孤衾數
行蠟淚替人亂落

金縷曲

讀史感事

塵世如棋局任忙忙翻雲覆雨幻疑蕉鹿胸臆消磨

今古事澆我一杯醺醪看滿眼雄飛雌伏睽瞍老羆
當道卧想爾時也自驚庸俗夢醒未飯炊熟軟紅
只悅無情目擁輕肥夾道多半俊遊金谷座上客來
霏玉屑羨煞雕龍炙轂怎肯效唐衢狂哭瞬息疾風
吹勁草待到頭空自悲華屋且聽唱渭城曲

換巢鸞鳳

月下憶遠和史梅溪韻

春未含嬌奈星沈碧渚路斷藍橋叫雲淒塞鴈坐月
怨隣簫休文寬盡可憐腰漫惆悵埋愁無地銷誰相
慰只趁有一鐙孤照清悄人渺渺心似亂絲誰省

曉
關懷抱細剖衷腸不堪回首難覓忘憂護草珍惜天
涯水雲身鏡顏空駐霜華老重逢時舊恩情立見分

高陽臺

冬曦照牖索居寡歡循覽昭明太子所
作陶靖節集序嘉其貞志苦節有生不
竝時之恨獨惜閑情一賦以爲白壁微瑕噫
寓意俳辭寄情燕婉旨趣所關歸於隱約古
人所謂勸百而諷一者乎因賦高陽臺調

出岫雲迴知還鳥倦就荒三徑猶存歸去來兮閉關
謝絕塵氛拈毫也作閑情賦感鴻飛懼寡愁殷重斯
人潔已清操歿世徒勤三閭五噫遙相望且逃名

栗里溷跡柴門弔詭傷時無言暗自銷魂南牕不改
琴書樂更欣然有酒盈尊趁良辰笑指東臯植杖耕
耘

木蘭花慢 讀陳孟公傳依柳詞第一體填

杜陵豪俠士盛車騎愛賓游更節擁專城人爭慕勢
留轄輕投綢繆錦屏絳蠟聽笙詞鼎沸起新謳雙袖
含香鵲腦十千貫酒貂裘 通侯逸氣罕儔驚廣坐
恣湛浮向夜闌一任縱橫履舄狼藉觥籌無愁放情
兀傲便簪車入巷也風流新得佳人未老阿君醉卧

妝樓

又 孟公投轄驚坐世艷稱之班固以其嗜酒落
魄見斥于法度之士列諸游俠傳中然跡其
行事亦有足多者遂依柳詞第二體爲孟公
解嘲世人之所爲孟公又羞而不道侯有識
者論定焉可也

孟公人傑也重然諾快恩讎任意氣無前衣冠恐後
名震方州優游未償博進念君恩祖德肯虛酬三輔
朝登薦剡二豪夕報虔劉 鳴騶治最河南紆印鞅
壯勲猷憶結客長安淋漓縱酒懷舊心稠難休百函
據答羨陳卿筆翰逞名流天下都知姓字驚人定讓

長頭

又憶雪仿程書舟詞體

數年來白髮見說道不相饒對漠漠層陰霏霏細雨
寒意蕭騷長空幾番弄影有昏鴉尚戀舊時巢花信
飄零易感鬢痕憔悴難消無邊落葉下林梢正天
黯雲驕奈范叔誰憐袁安自卧長是無聊吟情漸衰
漸嬾藉金樽銀燭鎮清宵何計將愁攪碎任他驢背
詩敲

又憶楸仿盧祖臯詞體

春風消息遠問楸影是誰添似何遜當年遲開吟社
空憶江南香魂未曾入夢記去年今日此巡檐莫漫
拋疎酒錢舊愁新恨相兼情知別久慊慊心事鎖
眉尖覓枝頭可有相思驛使遠寄芳緘孤山能招倦
客且腰纏騎鶴許同探待得橫斜照水十分香氣侵
簾

花犯

十一月十五日同人有月當頭之約連宵
陰晦此興頓減因作憶月詞以反其意

憶前宵澄空碧海清輝絕塵翳爽晴天氣看上界凌
虛仙子游戲眼前勝賞曾無幾人生行樂耳更不料

冷雲重疊迢迢銀漢水 濃陰倍增我無聊姮娥應
暗想孤吟滋味多少恨誰能訴廣寒宮裏何時又小
樓徹夜蟾影向吹簫人共倚但願得鏡圓依舊光騰
千萬里

水調歌頭

咏盆梅效賀東山三聲叶韻詞體

梅蕊已爭吐叶 寂寞伴吾廬雙清千古叶 愛梅成癖
是林逋姑射仙人來去叶 不畏霜欺風妬叶 甘占此
山孤春意欣如許叶 索笑且徐徐 暗香來疎影駐
叶 想西湖歲寒相顧叶 前身猶憶手親鋤明月清風

獨步

叶

玉骨冰姿天付

叶

隨分老巖居花下論心素

叶

忘却戀菰蒲

瑣窗寒

照

梅蕊欲破春信遲遲作憶春詞為花寫

耐雪精神凌寒骨氣皎然清迥孤根向暖不礙結廬
人境抱幽貞遲春未來澹情肯共羣芳並趁歲寒偃
蹇空山無伴好尋和靖 香冷橫斜影冠萬紫千紅
暗中管領冰心獨守最愛月明風靜隔經年重與故
人小窗細訴猶自等又何須夢繞羅浮一霎眠驚醒

催雪

墻角頽雲池上病鶴黯澹冰花欲翦鎮翠幙寒生賴
誰催趙是處紅衰綠減悄不意園林驚添換惠連攜
筆相如授簡恍遊梁苑 清翫幘頻岸召狎客醉吟
緬懷嵇阮况春意遲遲未教零亂好趁梅花夢醒且
鈎起晶簾垂銀蒜早占取一月春期又惹數聲羌管

玲瓏四犯

頭白歸來指舊日巢痕重又相認補屋牽蘿偷得此
身安穩蝸角也算功名不過是亂人方寸漫乞靈季
主詹尹忘却鏡中霜鬢 有金難鑄腰間印盼青雲

總知無分天門詖蕩斑蚪杳終悔鉛刀鈍閒數二十
四番莫等待花時不準任醉眠一覺長守着潛夫論

采桑子慢

冬夜聞鴈

寒蘆鬪雪陡覺霜天淒緊最旅雁無情幾度叫斷黃
昏似說羈懷怕人瞞着江南信多應留戀汀蘋岸蓼
供他新恨 孤枕夢驚有誰憐惜夜寒衝陣漫回首
磯邊冰影渡頭沙痕何處銷魂一重烟水一重雲關
河杳渺此情此際惆悵離羣

醜奴兒近

戊子除夕醉中效稼軒詞體

今宵廝守一霎便是明歲算七十年間諧徧萬般滋味
吞花卧酒銷盡了鬢雪心灰自拋懷抱曹騰何處
更有活計壯不如人侵尋鏡裏怎生迴避思單豹
巖棲尚學老萊兒戲却羨滕臣藉犧牲也弄狡獪食
牛干主功名晚達海內寡二

法曲獻仙音

試鐙前三日康山席上觀鐙戲

絃管烘春羽幢迎曉寫出昇平謠舞快近燒鐙緩停
催漏湖山盡供尊俎向綺席清聲度依然舊眉嫵
惹情緒託琵琶暗銷幽怨重掩抑遺曲有誰記否喚

起謫仙人嘆無繆三百腰鼓七子詩壇想風流今在
何許俯晴空欄檻只趁碧煙蒼樹

小石調獻仙音

戲效柳耆卿體

曾記初逢情分同心密意雙栖竝宿正好相偎倚怎
生料東西溝水分屬奈急漿淩波拋撇太匆促向誰
告深憐你抱溫柔心性可知花艷驚郎目致得沒
投奔只剩枕單人獨兩下煩冤縱無言亂我心曲悔
前事如何打疊忍教愁夢相續

霓裳中序第一

春雪

春寒太凜冽做雨翻晴猶釀雪長夜冷衾似鐵看沉
水漸銷燈花初結鴛屏瑩澈仗錦裯練幌重疊詩魂
瘦灑窗夢覺照影半明滅 清潔恍臨瑤闕似萼綠
華來髣髴飄然香氣透骨萬點胭脂淡粉輕拂滿枝
飛玉屑倩妙手徐黃暈活添佳景瓊樓高處待我喚
明月

側犯

近春社了破寒恰愛東風軟催趲看弄粉施朱暗中
換香圍曲徑小影落閒庭徧鶯燕休等待花飛向人

喚 紅紅白白著意輕裁翦春已半細思量光景去
如箭最是銷凝雨絲風片偷倚玉笛怎生排遣

最高樓

春駘蕩人爲看花留誰解爲春愁一生拚取千場醉
新晴能得幾番遊趁雙柑携斗酒聽鳴鳩 也不羨
牙門威建纛更不慕銅陵嬌貯屋成老嬾樂夷猶昌
黎願結雞豚社長卿愛典驢羈裘似浮雲隨聚散又
何求

安公子 春社

亭詞卷三
已是花飛片那堪杜宇聲聲勸廿四番風吹不盡恨
春情零亂只趁得衰紅暗綠閒庭院聽社鼓二月剛
過半奈好天良景爭忍流光如箭 羌笛添新怨短
長亭外游絲罥欲向花前留好語待商量鶯燕料此
後離愁逐漸天涯遠一紙書抵作相思券望愛惜韶
華休把萬金輕換

最高樓

仿書舟詞體

眼兒伶俐着意注嬌波纔一見便情多春風休負嘉
州釀艷詞須付泰娘歌七條絃兩行燭醉顏酡可

能變新聲娛客聽可能向芳洲捐珮贈情繾綣破愁
魔楊枝已去香山老柳枝尚待玉溪過眼前人心下
事總銷磨

金人捧露盤

梅花歷冰雪而不懼獨占春先笑
桃李之爭妍耻殿春後於其別也

歌以送之

愛春遲先春去怕春知小樓上羌笛休吹香雲入夢
半隨流水半沾泥新愁一點可知道瘦損瓊姿花
如錦人如織春如海酒如池須珍惜荏苒芳時驪歌
易感數聲鶉鴂夕陽低東風不管向空際盡日依依

洞仙歌令 柳眉

清愁萬斛被春寒僞憊忍對飛紅鎖眉岫鏡奩開曉
色移傍章臺晴未穩絲鬢牽風影皺一彎新月樣
京兆多情還恐鉛華畫難就灞岸悄無人立馬踟躕
凝眸望遠山依舊却不道疎雨暗中催只怕是啼粧
又添纖瘦

又一體 柳腰

年年隄畔恨千絲撩亂不繫花驄惜春晚自楚宮人
去舞袖飄零心情嬾一任春深春淺生來銷瘦慣

帶減圍寬長與東陽訴幽怨憶小蠻姿態張緒風流
離愁遠遮莫攀條腸斷正人在津亭草如烟愛貼地
身輕被風吹軟

享帚詞卷四

江都 秦恩復 伯敦父

蕙蘭芳引

題宋芝山吳餘山鮑東方月香女史湖上合作蘭花卷子

風扇晚涼畫橋畔綠陰城郭恁酒態花情常自殢人
繫著儘多韻事辜負了繡簾珠箔趁淺斟低唱各把
芳心鬪角淡墨裁牋濃香分畹稱意描摸更歌底
偎紅博得醉鄉笑嚙貌成雙蒂自憐腕弱真羨伊消
受筆牀茶格

琵琶仙 陳竹厓觀察鑑舟圖

千頃汪汪緬當日叔度神情超越迴憶齊魯燕秦貂
裘老霜雪三十載名場宦海暗消盡壯懷酣熱目送
風檣心侔古井襟抱如揭短篷裏添箇樵青效漁
父煙波弄空濶常把布帆安穩看雲重山疊隨處是
虛舟不繫肯等閒領取風月自有波浪恬時濟川功
業

龍山會

九月十日招集同人爲展重陽之會同
江鄭堂作

落帽人千古縱過重陽此會應須補乍晴還乍雨秋
陰薄釀得惜惜庭宇莫放酒杯空更何論誰賓誰主

看婆娑花光一片醉鄉深處沈思前事成塵白眼

青天漫作驚人語鬢絲羸幾許影騷屑化作柔腸千

縷借酒被清愁休錯認高陽儔侶只輸他錦屏步暗

小鬟歌舞

淒涼犯

哭李文竹岑

烏衣巷曲荒苔掩淒然一片凝綠暮春草長鶯花亂
舞不成芳躅春寒瑟縮更冷雨酸風滿目念平生誼
兼師友敢效寢門哭追憶前遊處筵繞歌珠逕聯
觴玉支筇踏屐渺思量不堪振觸曾幾何時漫贏得

新愁萬斛數年來耆舊凋零似轉燭

隔浦蓮近拍

題喜巡使蓮波淪茗圖

柳陰一帶清窈淥水迴環抱石鼎安排地茶槍熟鑪
煙裊列坐鋪茵草忘機好樂意親魚鳥野亭小浮
萍破處歌聲人影低繞紅衣贈遠遮莫水重煙渺雙
槳橫塘覓伴少清曉香風吹上林表

壽星明

壽張琴溪七十
一名沁園春

博望靈楂赤松飡餌世德載傳况人欽風度千秋寶
鑑夢摘華藻萬選青錢博物羣矜三篋富更留得清

河書畫船瀟灑甚任尊鱸意遠垂釣安便傳家夙

敦孝友看鳴珂里第秋丙星躔似引年耆舊齊名白
傳駐顏高隱賜號通元百忍堂開娛老壽便爭羨逍
遙行地仙從今後效東坡拄杖稱頌年年

蒼梧謠

月香女史墨蘭團扇

香翦翦輕寒淡淡妝春風裏長是抱幽芳
月只願團圓不願缺長相憶憶到那時節

春從天上來

王建有鏡聽詞爰廣其意用張玉田體

小立平階盼去鴻天未春與人乖昨夜燈花詰朝乾

鵲贏得兩地牽懷誰信蟲蟲心裏拋未得拂去紫來
向妝臺怕黛鈿空掃奩錦慵開 摩揩夜闌語悄早
對影聞聲百計安排輕啟葳蕤暗塵不動迴身斜溜
金釵一樣團圞光景憑誰付迢遞天涯漫疑猜儘兒
童笑唱拍手攔街

石湖仙

七月二十八日廖復堂都轉治酒古樸
花嶺為吳穀人祭酒壽招集同人繪圖
紀事即用姜白石原韻

雲停輿浦正星聚賢人賓館開處真不減山陰暢幽
情攜筇徑去羣仙高會看咫尺墨花酣舞相與似永

和觴詠俱古 新詞漫依舊調引清思雙聲疊句借
得秋陰更好移商流羽筆落珠璣曲傳金縷味兼瑤
柱非妄語名流半在蓮府

鳳簫吟

題獵騎圖

裂繻生年纔束髮雄心便請長纓一身都是膽龍泉
知己更虎帳談兵合圍殘燒遠觀平蕪盤馬蹄輕盡
驥子魚文淬花散影縱橫 知名五陵游俠臂鷹牽
犬不減豪情錦袍人似玉向樓前結隊爛若霞明任
翻空仰射看垂鞭七寶裝成待日暮聯鑣竝轡歸擁

虞旌

虞美人影 豔情效柳耆卿體

尋思欲見真無計遮莫伊人天際
日夜生憎紫繫顛
倒難猜謎
舊愁新恨何時砌
萬種千般牽綴怎得
生生世世守著盟和誓

一萼紅 夏慈仲竹巷舊居圖

故園荒任林慚澗愧猿鶴笑人忙
迢遞關河飛騰暮
景空歎蓬鬢堆霜
未能免抗塵走俗聊復爾馳逐少
年場自哂華顛功名蝸角仕路羊腸
今日展圖生

感念君家祖澤撫舊心傷笏護先朝硯封故匣門巷
猶認青楊且休戀文游臺畔報春暉何必水雲鄉莫
負一生心膽七尺昂藏

驀山溪 濮桐生飛文館圖

種瓜人杳悵望青門道射虎惜殘年氣如虹雄心未
埽憑虛懷古屈指幾經秋對斜陽憐衰草轉盼成鴻
爪
長安游倦苦憶家山好添箇卧遊圖便安排詩
囊畫蘂醉鄉容我是處有蘧廬酒泉封糟邱老底事
尋蓬島 李詩糟邱卽蓬萊君豪於飲善議論故云

豆葉黃

題韻蘭所畫蘭花團扇

美人顏色最銷魂
寶鴨濃煎沈水熏
一曲清詞酒一樽
憶王孫芳草年年綠到門

祝英臺近

初春卽事

探芳心凝望眼春事又將到
捲起重簾靈鵲傍簷噪
雪痕猶帶林均嫩寒輕暖鎮長是院深人悄
對花笑須待偷翦春工枝頭遞消耗
相約開時尊酒共傾倒肯教辜負風光
花應笑我漫輸與買春年少

清商怨

效花間體用周清真韻

深幃蘭燼漸小正繡衾熏了
自卸殘妝背鐙羞影照
天涯音信恨杳怕說愁愁與春到
寄語多情歸期千萬早

訴衷情

飄萍南北感平生
長劒夜孤鳴
愁無寐耿三更
蕭瑟此時情
休去慕浮名
且歸耕
何人爲我理哀箏
斷腸聲

品令

溶溶天氣越明豔
越添情味無語獨立重門閉
晝長

亭前記卷四
寂靜簾外吹香細
思折一枝勞遠寄把深情繫繫
怨紅泥損相思字亂愁無計空有看花意

引駕行 詠梅

春風駘蕩園林是處江梅綻愛清芬勝穠李天桃祇
饒鶯燕深羨甚破得寒來疎疎香影暗偷換想和靖
而今漸老有空山歲寒伴相戀
花開幾日已覺春
期過半快料理琴尊安排几席早張芳宴貪看念棲
遲燕市香雲縈夢幾年慣待盡把離情細訴凭闌干
畔

浪淘沙令

耐耐這風兒守著花枝番番只向五更吹怎奈花兒
情分久不忍輕離
飛片撲人衣難展雙眉花兒知
否怨封姨吹入一聲羌管裏感起相思

醉春風 春閨

猛雨拚花盡春愁還暗判重衾不耐五更寒忍忍忍
輕彈鮫綃半欹鴛枕背人偷揜
一夜風淒緊魂夢
何曾穩有書常是約歸期準準準多事燈花照人無
寐這般縈損

芳草渡 春寒

寒未褪悄不見尋香鶯儔燕侶念碧窗人靜消磨幾
陣疎雨夜半吟思苦兼聲聲悽訴砌合著一片愁來
怎散愁去恨春易老暗逐芳塵迷舊路只空趁飛
英數點因風撲簾戶乍寒乍暖做弄出傷春情緒見
細柳又學纖腰瘦舞

一翦梅

效蔣竹山詞體

惱恨東風大放嬌花也飄飄雨也蕭蕭十分春色五
分消攀住長條繫住輕撓偷得閒身自解嘲高掛

腰
柳瓢低按瓊簫衝泥何處覓芳醪紅上帘梢綠上裘

梅花引

醉時歌和賀東山韻

摸棱手兒婦口從來畫虎翻疑狗接羅巾遠風塵北
窗傲吏本是羲皇人黃埃赤日長安道春去秋來顏
漸老笑華顛兄事錢鍾鼎旂常氣象何萬千印懸
斗黃金壽麟閣勲名世稀有悔幡然舞翩翩聞雞夜
起誰爲撥鷗絃廣陵城下江干曲自顧轅駒憐局促
惜年光暮柴桑歸去來今意短鬢絲長

卜算子 上巳

料峭怯殘寒花事全無據零雨斜風斷送春隔住前
溪路金獸熱沉檀鎮日重簾護青眼逢迎慰柳條
綠暗鶯啼處

南歌子

紅山茶一名寶珠

豔色非經雨冬心不讓梅碧闌干外影徘徊待到濃
春天氣紅錦成堆好傷珊瑚架如擎赤玉梧胭脂
渦暈醉容頰堪笑等閒桃李一例相催

步蟾宮

門前流水桃花放做出那春陰模樣潘郎衰鬢不禁
春祇贏得白頭相向春光欲去難依傍漸隨著楊
花飄蕩楊花卻有惜春心盡勾起別離情況

小重山

開到酴醾春已深碧紗窗影重綠成陰黃昏庭院鎮
愔愔簾半捲晴色上苔岑塵夢悵難尋閒看魚鳥
意感飛沈杜鵑聲裏暗關心雙蓬鬢憔悴到而今

二郎神

小重陽日同人邀傷花村看菊

重陽近共採取東籬花信正玉露金風初薦爽郊原

迴碧天清潤應是秋濃人意淡釀就了芳心一寸看
嫩葉高低影亞對我如絲雙鬢 遙認尋常巷陌酒
帘微隱也不減籃輿朋舊約行樂處依稀東晉且把
閒身容易過向詹尹榮枯莫問笑身外浮名盡被紫
牽何如隨分

長亭怨慢 元夕觀燈

愛三五春城如畫鬧蛾兒六街閒要我也婆娑老來
情味恣瀟灑踏歌叢裏隨處是飄蘭麝怎忍便歸休
始信道風光無價 遊冶看香車似織蜨影暗留裊

袂珠簾半捲儘消得玉郎驄馬最好是月地花天渾
忘卻籤聲頻下漫倚醉秦樓誰省花開花謝

蜨戀花 題貢倚蓮小像

澹霧冥濛初破曉庭院深深春色濃多少六曲闌干
人意悄關心紅豆花開了 珍惜韶光須及早玉兔
金烏換卻朱顏好感損眉山慵不掃等閒莫被鶯花
惱

玲瓏四犯 汪劔潭先生挽詞

鶴怨空山悵過眼搏沙身世如寄電影駒塵詩酒也

供顛顚何用老去逃禪便繡佛可諧真諦儘燒豬玉
版同叅卻有子瞻風味 暮年詞賦驚人麗擘蠻牋
洛陽爭貴名場宦海歸虛幻銷盡崢嶸氣留得與健
與閒長領略溪山點綴付瓣香一寸紫舊夢心如醉
珍珠令 宋廣文于庭暉小伎珍珠詞以調之
香雲已逐歌塵散音書短悶損得春心慵嬾離恨杳
無憑有憑惟淚眼 淚比珍珠流不斷寂寥夜怎生
心展心展願十斛量珠柔情一拂

百字折桂令 秋興

少年心事薄雲霄班生擲筆封侯銘勒天山痛飲月
氏頭掃欖槍妖星隕墜笑看吳鉤千騎萬騎坐擁貔
貅人銜馬嘶看黃沙白草氣壓兜鍪 悔誤儒冠便
請纓誰信終童壯謀願安初服指東籬且同陶令歸
休委心造化高臥林邱自有琴尊娛老山中細數春
秋

燕歸梁 悼亡姬慈曼效史邦卿體

碧翦秋痕澹未消聽雨碎窗蕉珮環響寂夢雲遙忍
說道永相拋 梧桐金井飄涼葉惹愁緒鎮無慘蟲

聲楚切鴈聲高儘占斷可憐宵

又效柳耆卿體

餘軸遺絃四壁留空長簾冷香篝好天良夜起新愁
縱苦憶若浮休招魂擬問鴻都客迷三島隔方洲
鬢絲點雪已盈頭可煞是不宜秋

菩薩蠻

衣釵典盡猶留客傷心盡匣餘香澤忍淚理遺裘不
言空斷魂玉臺塵暗積顧影翻憐隻三尺疊輕羅
濕痕何處多

烏夜啼

斜鞦牀兒欲倦鐙兒閃閃驚眠心兒長被更兒亂拋
去又縈牽漏盡寒衾似鐵醒來暖炷微然簾兒約
住窗兒影生怕月兒圓

摸魚兒

十月初一日立冬有以送秋爲題者因和辛稼軒韻

好秋光又無風雨依依誰送秋去月痕霜影搖空碧
猶有菊叢無數秋且住可認得柴桑三徑行吟路問
天不語只挂笏看山穿雲尋壑別意亂如絮平生
事應把儒冠悔誤無媒空枉憎妒班姬但解題紈扇

有恨也無人訴休起舞君不見長安車馬紛塵土人
情易苦須學得陶潛吹衣冉冉惆悵送君處

三犯渡江雲

秋懷

霜臯凋晚葉井睂乍掩冷落盼歸秋趁西風未緊問
道棲鴉底事肯勾留盤空舞籜隔不斷天際凝眸憑
畫欄淡煙斜日渺渺漾新愁 心頭情傷漂泊影抱
淒涼怎知人意舊偏可憐窗銜圓魄被冷香篝鐙花
慣結無心字對好景都是浮漚倏憊甚除非夢也悠
悠

絳都春

題唐六如美人吹簫圖步陳君衡平韻

梨花院落正嫩晴未放尚帶餘寒翠袖玉纖簾鉤初
挂燕飛閒瓊簫不共春心懶皺峰偷上睂彎滿庭花
影微風暗逗竟體芳蘭 婀娜天生妙質看胭脂暈
色粉黛凝痕最是這時傷春滋味易黃昏歌喉慣逐
梁塵遠曼聲如聽鳴鶻小鬟催拍清冷盡日遠欄

採芳信

初春書懷

愛春早問擺蕩殘寒東風多少對滿庭花影還似去
年好阿婆三五當年事尚憶長安道

今年已
丑會試縱萼鱸

不解思歸也愁人老 七十古稀了總萬事由天俗
情都掃次第銷磨且圖取沒煩惱少年跌宕凌雲氣
詎肯甘溫飽到而今月底花陰醉倒

越女鏡心 元宵燈詞

虛白窗深嫩紅枝透最是春情難翦徹夜笙歌滿城
燈火珠樓迥接天遠正一望千門晝徘徊訝宵短
月光滿耿星橋頓開心眼誰與我同聽玉龍檀板試
叩廣寒宮按霓裳音韻清婉老矣婆婆笑兒童興復
不淺且如泥拚醉共踏香塵輕軟

四園竹 和周清真韻

清芬襲座畫掩白雲扉好花照眼嘉景賞心瀟灑庭
幃移我情春正在濃香雪裏此情難遣花知 究誰
其相思欲寄伊人流連後約何期到得腸迴九曲睂
鎖千山細寫芳辭情滿紙奈盼斷江南鴈影稀

驀山溪 爲顧湘舟題平山紀游圖

遠山如黛隔岸浮晴靄垂柳亘長隄四圍青雲容水
態白蘋乍起吹散蔚藍天煙漠漠水鱗鱗雙槳紅橋
外 歐蘇往矣勝事今難再俯仰閱千年有多少風

事類詩卷四
慨醉眠花月長與古人期娛暮景課清虛便是
超塵界

賀新涼

題安青居跨虎小照

歷盡崎嶇路飽風霜殘山剩水匪朝伊暮憑仗一身
渾是膽那計六州錯鑄漫指點家山何處叱咤雄心
聊復爾笑人間跼蹐如狐兔占履尾兩三步拈毫
寫出春冰意踏芒屨深穩靜聽流泉飛布手內摩挲
三尺劒斫地悲歌幾度有誰念天涯羈旅掉臂游行
看自在任茫茫一霎懷千古浮大白醉中舞

江城梅花引

松陰如蓋護重門是雲痕是月痕佇月停雲玉軫對
金尊都道一身閒似鶴三疊後有胎仙檻外聞夜
分夜分活火溫酒漸醺燭漸昏醉也醉也醉夢裏斜
倚雲根鶴和焦桐清韻沁詩魂誰識七條絃外旨重
洗酌墨縱橫寫練袞

詞卷四

卷之五

武財集卷四